

Na osnovu člana 15. Zakona o principima lokalne samouprave u Federaciji BiH („Službene novine Federacije BiH”, broj: 49/06 i 51/09) i člana 45. Statuta Općine Kakanj („Službene novine Općine Kakanj”, broj: 4/08), Općinski načelnik na ____ sjednici Općinskog vijeća održanoj ____ . ____ .2021. godine, p o d n o s i:

IZVJEŠTAJ

o ostvarivanju politike jedinice lokalne samouprave i aktivnostima Općinskog načelnika za 2020. godinu

U V O D

Općinski načelnik je nadležan za provođenje općinske politike i izvršavanje općinskih propisa, kao i obavljanje svih dužnosti koje na općinu prenesu kantonalne i federalne vlasti. Zakon o principima lokalne samouprave u Federaciji BiH jasno definiše da općina ima pravo, osim vlastite nadležnosti ustanovljene Ustavom, baviti se i svim pitanjima od lokalnog značaja koja nisu isključena iz njene nadležnosti, niti dodijeljena u nadležnost nekoj drugoj vlasti na osnovu Ustava i zakona. U cilju poštivanja ustavnosti, zakonitosti i javnosti u provođenju općinske politike, načelnik Općine Kakanj dužan je izvještavati Općinsko vijeće o provedenim aktivnostima i obavljenim poslovima iz djelokruga lokalne samouprave i prenesenih poslova sa viših nivoa vlasti.

Radom Jedinštenog općinskog organa uprave rukovodi Općinski načelnik, kao organ izvršne vlasti u Općini, a u skladu sa Ustavom, zakonima, Statutom i drugim važećim propisima. Rukovođenje Jedinštenim organom uprave, Općinski načelnik ostvaruje putem svojih pomoćnika, koji neposredno rukovode službama za upravu.

U izvještajnom periodu aktivnosti Općinskog načelnika i Jedinštenog općinskog organa uprave Općine Kakanj bile su usmjerene, kako na redovne (Programom rada utvrđene zadatke), tako i na vanredne poslove koji su se pojavljivali u toku rada. Aktivnosti Općinskog načelnika su u svakom trenutku bile usmjerene na poboljšanje položaja Općine kao jedinice lokalne samouprave, te podizanje kvaliteta života građana općine na viši nivo.

AKTIVNOSTI OPĆINE KAKANJ I OPĆINSKOG NAČELNIKA U 2020. GODINI

U toku izvještajnog perioda Općinski načelnik je usmjeravao djelovanje Jedinštenog općinskog organa uprave Općine Kakanj u obavljanju poslova iz samoupravnog djelokruga Općine i nadzirao njegov rad. Aktivnosti Općinskog načelnika i Jedinštenog općinskog organa uprave Općine Kakanj u 2020. godini bile su usmjerene u slijedećim pravcima:

I LOKALNI EKONOMSKI RAZVOJ, PODUZETNIŠTVO I POLJOPRIVREDA

U 2020. godini realizirane su brojne aktivnosti koje su usmjerene na razvoj poduzetništva, obrta i nova zapošljavanja, te brojne podsticajne mjere za pokretanje i razvoj malog i srednjeg poduzetništva. Pojava virusa COVID-19, umanjila je aktivnosti intenzivnijeg stvaranja povoljnijeg poslovnog ambijenta i ulaganja domaćeg i stranog kapitala na području općine Kakanj, ali su ipak nastavljene aktivnosti na iznalaženju potencijalnih investitora koji su spremni ulagati na području naše općine. U tekućoj godini uz realizaciju programa općinskih podsticaja u oblasti poduzetništa i poljoprivrede, implemenitarani su i projekti u saradnji sa njemačkom nevladinom organizacijom „HELP“, Udruženjem za poduzetništvo i posao „LiNK“ i Caritasom Švicarske.

U cilju očuvanja radnih mjesta, donesena je i realizovana Odluka o odobravanju podsticajnih sredstava fizičkim i pravnim licima registrovanim na području općine Kakanj čije je poslovanje obustavljeno zbog epidemiološke situacije izazvane pojavom virusa COVID-19. Pravo na dodjelu podsticajnih sredstava ostvarilo je 133 pravna/fizička lica koja zapošljavaju 295 radnika a utrošeno je **55.627,93 KM**.

Radi saniranja posljedica izazvanih pojavom virusa COVID-19 realizovana je i Odluka o oslobađanju plaćanja općinske takse na istaknutu firmu na području općine Kakanj, broj: 01/1-2-PV-121/20 od 08.05.2020. godine. Poslovni subjekti koji su registrirani na području općine Kakanj, a čiji je rad bio obustavljen naredbama Federalnog štaba civilne zaštite oslobođeni su plaćanja općinske takse na istaknutu firmu od 15.03.2020. godine do isteka 30 dana od dana proglašenja prestanka stanja nesreće.

U Budžetu Općine Kakanj za 2020. godinu za podsticaj razvoja poduzetništva i obrta opredijeljen je iznos od 440.000,00 KM, od kojeg je utrošeno 411.098,31 KM. Uz realizirana općinska novčana sredstva za podsticaj u oblasti poduzetništva i obrta, realizirana su i sredstva Evropske unije i njemačke nevladine organizacije „HELP“ u ukupnom iznosu od 109.421,24 KM. Znači, u oblasti poduzetništva i obrta u 2020. godini realizirani su podsticaji u ukupnom iznosu od **520.519,55 KM**.

Kroz projekat „Pokreni svoj posao u Kaknju“, podsticaj su ostvarile 23 nezaposlene osobe koje su, uz pomoć Općine, pokrenule i registrirale vlastitu djelatnost. Korisnicima podsticajnih sredstava sufinansirana je nabavka sredstava za rad, repromaterijala, opreme i sl., za registrovanu djelatnost u maksimalnom iznosu do 3.000,00 KM i refundiraju se troškovi obaveznih doprinosa – PIO, zdravstveno osiguranje i osiguranje od nezaposlenosti, za registrovanu djelatnost – period od 24 mjeseca (prva godina u iznosu od 100%, a maksimalno 383,00 KM/mjesec, druga godina 50%, a maksimalno 191,50 KM/mjesec). Za realizaciju projekta „Pokreni svoj posao u Kaknju“ utrošena su sredstva u iznosu **81.422,54 KM**.

Podsticajna sredstva namijenjena za refundaciju troškova registracije novoosnovanih poslovnih subjekata u 2020. godini isplaćena su za 54 korisnika – 14 pravnih lica i 40 fizičkih lica. Utrošena su sredstva u iznosu od **30.099,11 KM**.

Sufinansiranjem troškova zapošljavanja u skladu sa potrebama poduzetnika i obrtnika sa područja općine Kakanj omogućeno je zapošljavanje nezaposlenih osoba sa područja općine Kakanj u trajanju od 12 mjeseci – Općina Kakanj sufinansira bruto plaću u iznosu 50% minimalne bruto plaće Federacije BiH (maksimalno do 325,00 KM/mjesečno u trajanju od 6 mjeseci), a poslodavac 50%. Također obaveza poslodavca je da preostalih 6 mjeseci finansira u punom iznosu bruto plaću zaposlenika. Pravo na dodjelu podsticajnih sredstava ostvarilo je 8 poslovnih subjekata koji su zaposlili 21 radnika. Utrošena su sredstva u iznosu **19.175,00 KM**.

U saradnji i partnerstvu sa Općinom Jablanica, Općinom Konjic, Udruženjem „LiNK“ Mostar, Službom za zapošljavanje HNK, Službom za zapošljavanje ZDK – Biro Kakanj, Univerzitetom „Džemal Bijedić“ Mostar, firmom „RadIN“ d.o.o. Mostar i firmom „Jablanit“ d.o.o. Jablanica, realiziran je Projekat „Međuopćinskom saradnjom do bolje i inkluzivnije podrške prakse start up-ima“, koji finansira Evropska unija, a realizuju GIZ, UNDP i MOR. U toku aktivnosti na realizaciji projekta u proteklom periodu održan je ciklus obuka „Pokreni svoj posao“. Kroz interaktivni rad sa certificiranim trenerima 22 kandidata (od ukupno prijavljenih 38) su uspješno završili obuku po metodologiji Međunarodne organizacije rada (MOR). Nakon završene obuke 22 kandidata su svoje poslovne planove predstavili Komsiji za odabir korisnika grant sredstava. U skladu sa raspoloživim sredstvima pravo na dodjelu grant sredstava ostvarilo je 12 kandidata koji su registrovali djelatnost. Ukupan fond za pokretanje novih biznisa za Općinu Kakanj (namijenjen za nabavku opreme) iznosio je 66.667,00 KM, od čega su donatorska sredstava 59.695,67 KM. Pored finansijskog učešća u nabavci opreme 6.971,00 KM, Općina Kakanj će refundirati troškove obaveznih doprinosa za 12 korisnika projekta u trajanju 12 mjeseci. Za ovaj projekat utrošena su sredstva u iznosu **77.363,89 KM**.

Općina Kakanj je sufinansirala i Projekat „Podrška socio-ekonomskoj stabilnosti regije zapadnog Balkana 2019-2020“ koji je finansiran od strane Vlade Savezne Republike Njemačke kroz Pakt za stabilnost Jugoistočne Evrope. Navedeni projekat je implementirala Njemačka nevladina organizacija „HELP“. Podsticaj je ostvarilo 16 fizičkih lica koji su u posljednjih 5 godina registrovali djelatnost koristeći općinska podsticajna sredstva namijenjena za projekat „Pokreni svoj posao u Kaknju“. Svaki grant se sastojao od materijalnih sredstava potrebnih za poslovnu aktivnost, a koje je za potrebe korisnika nabavio „HELP“.

Kada je u pitanju sufinansiranje zapošljavanja osoba sa invaliditetom, podsticaj je ostvarilo 1 pravno i 2 fizička lica koja upošljavaju 12 osoba sa invaliditetom. Podsticajna sredstva su utrošena za sufinansiranje nabavke repromaterijala neophodnog za registrovanu djelatnost. Utrošeno je **5.500,00 KM**.

Troškovi snimanja i emitovanja 7 polusatnih emisija u svrhu promocije korisnika općinskog podsticajnog projekta „Pokreni svoj posao u Kaknju“, usluge štampanja Vodiča za investitore i Kataloga slobodnih lokacija – parcela, godišnja pretplata na paket usluga portala akta.ba (pristup podacima poslovnih subjekata, informacija o aktuelnostima iz oblasti poduzetništva) su iznosili **13.730,13 KM**.

Shodno ugovorenim obavezama prema korisnicima podsticajnih sredstava „Pokreni svoj posao u Kaknju“ iz 2018. i 2019. godine (refundacija troškova obaveznih doprinosa i sufinansiranje nabavke sredstava za rad, repromaterijal, opremu i sl., za registrovanu djelatnost) isplaćena su podsticajna sredstva za 69 korisnika sa kojima su potpisani ugovori u 2018. i 2019. godini. Također su isplaćena i podsticajna sredstva za 14 korisnika koji su u proteklim godinama (2016., 2018. i 2019. godina) ostvarili pravo za „Regresiranje kamata za kredite odobrene u komercijalnim bankama za poduzetnike i obrtnike sa područja općine Kakanj“ (Općina Kakanj korisniku podsticaja refundira kamate za cijeli otplatni period, pojedinačno za svaku godinu na kraju kalendarske godine, po dostavljanju potvrde od banke o uplaćenim kamatama). Utrošeno je **185.377,33 KM**.

Općina Kakanj je isplatila i zakupninu (1 mjesec) licima koja koriste pijačni prostor-robnu pijacu na osnovu ugovora o zakupu, a registrovani su za tu vrstu djelatnosti. Također su plaćeni troškovi zakupnine jednom licu koje zapošljava osobe sa invaliditetom, te su finansijski podržana dva fizička lica čije je

poslovanje obustavljeno zbog epidemiološke situacije izazvane pojavom virusa COVID-19, a nisu na to ostvarili pravo tokom Javnog poziva namijenjenog za ovu vrstu pomoći.

Za finansiranje troškova rada zaposlenika Udruženja „Razvojni centar općine Kakanj“ i troškova rada kancelarije Udruženja isplaćena su sredstava u iznosu **31.620,56 KM**.

U saradnji sa Ekonomskim fakultetom Univerziteta u Zenici urađena je Studija o vrednovanju i preporukama za realizaciju podsticajnih programa Općine Kakanj i to za projekte: „Refundacija troškova registracije firmi“, „Pokreni svoj posao u Kaknju“ i „Sufinansiranje troškova nabavke mašina i opreme u cilju proširenja djelatnosti i povećanja broja zaposlenih“.

Kako bi mlade nezaposlene osobe sa VSS stručnom spremom stekle prvo radno iskustvo, provedena je procedura prijema **34** lica na stručno osposobljavanje ili pripravnika (VSS) u privatnom sektoru. Iz 2019. godine preuzeli smo obaveze refundacije za 28 lica, što znači da smo u 2020. godini finansirali 62 pripravnika ili lica na stručnom osposobljavanju. Za ove namjene iz Budžeta Općine Kakanj je izdvojeno **162.000,00 KM**. Svim poslodavcima koji su aplicirali na javni poziv odobren je angažman pripravnika ili lica na stručnom osposobljavanju.

U oblasti poljoprivrede, tokom 2020. godine, primljene su 4.154 stranke. U Registar poljoprivrednih gazdinstava i registar klijenata je do kraja 2020. godine upisano 1.887 poljoprivrednih gazdinstava i klijenata (u 2020. godini u RPG i RK upisano je 72 poljoprivredna gazdinstva i klijenta, a 704 gazdinstva su ažurirali podatke). U 2020. godini 56 lica je upisano u Registar pčelara i pčelinjaka Federacije BiH (do sada je ukupno upisano 139 pčelara).

Komisija za pripremu, organizaciju i realizaciju podsticaja u oblasti poljoprivrede za 2020. godinu je u toku protekle godine odobrila podsticaje za **1.176** podnešenih zahtjeva. Preduslov za ostvarivanje podsticaja je upis u RPG i RK, te ažuriranje podataka upisa u RPG i RK za 2020. godinu.

U 2020. godini realizirani su slijedeći podsticaji u oblasti poljoprivrede:

- Za proizvedene-otkupljene količine svježeg kravljeg mlijeka za IV kvartal 2019, I, II i III kvartal 2020. godine (organizovani otkup) isplaćen je iznos od **70.957,96 KM**, a ukupno je primljen, obrađen i odobren 201 zahtjev. Ukupna predata i otkupljena količina svježeg kravljeg mlijeka sa područja općine Kakanj u 2020. godini iznosila je **743.206** litara.
- Za proizvođače svježeg kravljeg mlijeka koji nisu u organizovanom otkupu mlijeka (prodaja svježeg kravljeg mlijeka i mliječnih proizvoda na Zelenoj pijaci u Kaknju) isplaćen je iznos od **3.900,00 KM**, a ukupno je primljeno, obrađeno i odobreno 13 zahtjeva.
- Za podsticaj za rasplodne krmače isplaćen je iznos od **3.950,00 KM**, a ukupno je primljeno, obrađeno i odobreno 13 zahtjeva.
- Za podsticaj za pčelarstvo isplaćen je iznos od **21.768,00 KM**, a ukupno je primljeno, obrađeno i odobreno 119 zahtjeva.
- Za plasteničku i stakleničku proizvodnju isplaćen je iznos od **22.286,25 KM**, a ukupno je primljeno, obrađeno i odobreno 95 zahtjeva.
- Za proljetnu obradu poljoprivrednog zemljišta isplaćen je iznos od **9.077,90 KM**. Općina Kakanj se obratila Vladi Federacije BiH za finansijsku pomoć za unapređenje biljne proizvodnje, te su Općini odobrena sredstva u iznosu od 80.000,00 KM za podsticanje razvoja biljne proizvodnje. Navedena sredstva su utrošena na ulaganja u biljnu proizvodnju na području općine Kakanj, kao što su sufinansiranje nabavke sadnog i sjemenskog materijala, mineralnih đubriva i zaštitnih sredstava, plasteničke UV folije, poljoprivredne mehanizacije, za proljetnu obradu poljoprivrednog zemljišta, te za nabavku 10 plastenika i dio sredstava za nabavku paketa za proizvodnju jagode u saradnji sa Caritasom. Za ovaj podsticaj je primljeno, obrađeno i odobreno 254 zahtjeva. Imajući u vidu epidemiološku situaciju i pojavu pandemije uzrokovane koronavirusom (Covid-19), Federalno ministarstvo poljoprivrede, vodoprivrede i šumarstva je raspisalo javni poziv općinama i gradovima Federacije BiH za podsticanje proljetne sjetve. Općina Kakanj je potpisala sporazum sa Federalnim ministarstvom poljoprivrede, vodoprivrede i šumarstva i Ministarstvom za poljoprivredu, šumarstvo i vodoprivredu ZDK, u kojem su navedena učešća za proljetnu sjetvu (70% FMPVŠ, 20% Ministarstvo za poljoprivredu, šumarstvo i vodoprivredu ZDK i 10% Općina Kakanj). Na preliminarnu listu za ostvarivanje podsticaja za proljetnu sjetvu se prijavilo 209 poljoprivrednih proizvođača, a podsticaj je ostvarilo 171 lice. Učešće Općine Kakanj u ovom projektu je bilo **9.077,90 KM**.
- Za održavanje intenzivnih i poluintenzivnih zasada visokostablašica (jabučasto, koštičavo i jezgrasto voće) isplaćen je iznos od **15.225,30 KM**, a ukupno je primljeno, obrađeno i odobreno 43 zahtjeva.
- Za održavanje zasada jagodastog voća, a koji nisu u organizovanom otkupu (aronija, američka borovnica, ribizla i dr.), te pitomog šipurka, isplaćen je iznos od **1.588,30 KM**, a ukupno je primljeno, obrađeno i odobreno 6 zahtjeva.

- Za proizvedene-otkupljene količine ploda jagodastog voća isplaćen je iznos od **19.801,76 KM**, a ukupno je primljeno, obrađeno i odobreno 159 zahtjeva. Ukupna predata i otkupljena količina ploda jagodastog voća sa područja općine Kakanj u 2020. godini iznosi **165.014,41 kg**.
- Za registraciju poljoprivrede kao osnovne djelatnosti (start up paketi) utrošeno je **11.514,07 KM**. Ovaj podsticaj je namijenjen za refundaciju troškova obaveznih doprinosa (PIO, zdravstveno osiguranje i osiguranje od nezaposlenosti) za registraciju srodne djelatnosti – poljoprivreda (osnovna djelatnost), a ukupno je registrovano 5 samostalnih poljoprivrednika.
- Za sufinansiranje nabavke stočne hrane za samostalne poljoprivrednike koji ne ostvaruju općinske podsticaje za proizvodnju za koju su registrovali djelatnost isplaćen je iznos od **2.603,00 KM**, a ukupno je primljeno, obrađeno i odobreno 6 zahtjeva.
- Za sufinansiranje nabavke opreme i mašina za registrovane prerađivačke kapacitete u oblasti poljoprivrede za pravna i fizička lica sa područja općine Kakanj isplaćen je iznos od **20.000,00 KM**, a ukupno je primljeno, obrađeno i odobreno 2 zahtjeva.
- Za sufinansiranje troškova rada 8 udruženja poljoprivrednih proizvođača – članica Saveza „KAP“ Kakanj, isplaćen je iznos od **4.000,00 KM**, a ukupno je primljeno, obrađeno i odobreno 8 zahtjeva.
- Shodno Memorandumu o razumijevanju, broj: 02/1-962/20 od 07.02.2020. godine, potpisanim između Općine Kakanj i Caritasa Švicarske, a vezano za Projekat „Stvaranje prihoda i radnih mjesta u poljoprivrednom sektoru u Bosni i Hercegovini – (IGAS)“, osigurana su donatorska sredstva od strane Caritasa Švicarske u iznosu od 40%, Općine Kakanj u iznosu od 50% i vlastitog učešća korisnika u iznosu od 10%, a u cilju razvoja plasteničke proizvodnje i proizvodnje jagode na području općine Kakanj. Na Javni poziv za dodjelu plastenika se prijavilo 50 aplikanata, a za dodjelu paketa jagoda 6 korisnika. Projektom je nabavljeno i podijeljeno 30 plastenika od 100 m² sa dodatnom opremom za 30 korisnika, te paketi jagode sa dodatnom opremom za površinu od po 1.000 m²/korisniku za 6 korisnika. Ukupna vrijednost projekta je **103.460,10 KM**, a od toga Općina je uplatila sredstva u iznosu od 34.374,18 KM.
- Projekat „Zajedno protiv širenja COVID 19“ se realizovao u sklopu Regionalnog programa lokalne demokratije na Zapadnom Balkanu, kojeg finansira Evropska unija, a implementira Razvojni Program Ujedinjenih naroda (UNDP). Savez „KAP“ Kakanj je uradio i predao projektnu dokumentaciju na iznos od 20.000,00 KM, a ciljane grupe su poljoprivredni proizvođači sa područja općine Kakanj, koji su registrovali poljoprivredu kao osnovnu i dopunsku djelatnost, proizvođači koji imaju ugovorene i organizovane otkupe tržišnih viškova poljoprivrednih proizvoda (otkup svježeg kravljeg mlijeka, otkup jagodastog voća i dr.), kao i proizvođači koji prodaju svoje vlastite proizvode na Zelenoj pijaci u Kaknju. Cilj projekta je da se pomogne poljoprivrednim proizvođačima u zaštiti od širenja zaraze Corona virusa, a kroz projekat su nabavljena i podijeljena sredstva za dezinfekciju ruku i površina, maske, rukavice (zaštitne i radne), kecelje, uređaji za aplikaciju, poljoprivredne alatke, prskalice i promotivni materijal. Imajući u vidu da se radi o izravnoj pomoći velikom broju poljoprivrednih proizvođača, Općina Kakanj je učestvovala u implementaciji Projekta kao sufinansijer u iznosu od **5.000,00 KM**.
- Za otkupljivače svježeg kravljeg mlijeka za I, II i III kvartal 2020. godine isplaćen je iznos od **6.256,70 KM**, a ukupno su primljena, obrađena i odobrena 2 zahtjeva. Ukupna otkupljena količina svježeg kravljeg mlijeka u 2020. godini od strane otkupljivača sa područja općine Kakanj iznosi **789.816 litara**.
- Za otkupljivače ljekovitog bilja, voća i povrća od individualnih poljoprivrednih proizvođača sa područja općine Kakanj isplaćen je iznos od **1.303,83 KM**, a ukupno su primljena, obrađena i odobrena 2 zahtjeva. Ukupna prijavljena i otkupljena količina ljekovitog bilja, voća i povrća od strane 2 otkupljivača iznosi **130.383,10 kg**.
- Za ugovorene obaveze iz 2018. i 2019. godine (refundacija doprinosa za registrovane poljoprivredne proizvođače, certificiranje organske proizvodnje i dr.) isplaćen je iznos od **44.119,29 KM**.
- Neisplaćeni podsticaji iz 2019. godine u iznosu od **22.767,82 KM** su planirani i isplaćeni iz Programa utroška sredstava iz Budžeta Općine Kakanj za podsticaje u poljoprivredi za 2020. godinu.
- Za izvještajno-prognozne poslove isplaćen je iznos od **8.852,39 KM**.
- Za teoretske i praktične edukacije iz oblasti poljoprivrede isplaćeno je **296,49 KM**, a održana je 1 teoretska edukacija.
- Rezervna sredstva za hitne i nepredviđene aktivnosti u oblasti poljoprivrede koje se pojave tokom budžetske godine isplaćena su u iznosu od **18.793,00 KM**, a ukupno je primljeno, obrađeno i odobreno 22 zahtjeva. Navedena sredstva su utrošena za finansijsku pomoć poljoprivrednim proizvođačima i udruženjima, i to za štete nastale u oblasti stočarstva za 8 poljoprivrednih proizvođača, štete u oblasti voćarstva za 1 poljoprivrednog proizvođača, finansijska pomoć po raznim pitanjima za 10 poljoprivrednih proizvođača, te finansijska pomoć udruženjima poljoprivrednih proizvođača za sufinansiranje projekata (3 zahtjeva).
- Za finansiranje troškova rada Saveza „KAP“ Kakanj planirana su sredstva u iznosu od **33.000,00 KM**.

Pored navednog poduzete su i aktivnosti u vezi organizacije manifestacije „Kakanjski dani 2020“ – Dani poljoprivrede i poduzetništva Kakanj 2020., ostvarena je dobra saradnja sa Poljoprivredno-prehrambenim fakultetom Sarajevo, Veterinarskim fakultetom Sarajevo i Agromediteranskim fakultetom Mostar, Savezom poljoprivrednih udruženja „KAP“ Kakanj, udruženjima poljoprivrednih proizvođača i zadrugama, veterinarskim stanicama, otkupljivačima tržnih viškova poljoprivrednih proizvoda, pravnim i fizičkim licima sa područja općine Kakanj, medijima, i dr.

U Budžetu Općine Kakanj za 2020. godinu, a shodno Programu utroška sredstava za podsticaje u poljoprivredi za 2020. godinu, za općinske podsticaje u oblasti poljoprivrede odobreno je 386.000,00 KM, a realizovano **348.436,24** KM. Uz navedena novčana sredstva za općinske podsticaje u poljoprivredi, realizovana su i sredstva sa viših nivoa vlasti (Vlada Federacije BiH, Federalno ministarstvo poljoprivrede, vodoprivrede i šumarstva i Ministarstvo za poljoprivredu, šumarstvo i vodoprivredu ZDK) za unapređenje biljne proizvodnje i proljetnu sjetvu na području općine Kakanj u iznosu od **149.396,56** KM, te sredstva za projekte nabavke plastenika i proizvodnje jagode na otvorenom polju u saradnji sa humanitarnom organizacijom Švicarski Caritas u iznosu od **51.105,99** KM. Znači, u 2020. godini, za razvoj poljoprivrede na području općine Kakanj ukupno je utrošeno **548.938,79** KM.

Kontinuiranim izdvajanjem sredstava iz Budžeta Općine Kakanj za podsticaje u oblasti poljoprivrede, ova privredna grana se intenzivnije razvija na području općine Kakanj, a stanovništvo je sve više zainteresirano za ovu oblast, što pokazuje broj primljenih stranaka, kao i povećanje prinosa i prihoda u pojedinim oblastima poljoprivrede.

Zahvaljujući provedenim ekonomskim i podsticajnim mjerama i politikama, Kakanj danas ima najbolju podsticajnu politiku od svih lokalnih zajednica u BiH. Kao potvrda našeg opredjeljenja da sve naše slobodne resurse stavimo privrednicima na raspolaganje s ciljem razvoja i jačanja Kaknja je i posjedovanje renomiranog **BFC SEE certifikata**. Općine koje uspiju da ispune uslove za sticanje BFC SEE certifikata se pozicioniraju kao najnaprednije lokalne samouprave u regionu, čime se kvalifikuju za podršku nacionalnih i međunarodnih institucija i donatora, uz aktivnu promociju na regionalnom i međunarodnom nivou. BFC SEE certifikat je priznanje i obaveza za bržu i efikasniju administraciju, kvalitetnije pružanje usluga prije svega privrednim subjektima i investitorima, bolje investicione rezultate, odnosno sve ono što utiče na kvalitet povoljnog poslovnog okruženja.

II RAZVOJ INFRASTRUKTURE

Kakanj je jedna od rijetkih općina u kojima opća kriza nije zaustavila razvoj infrastrukture, te se uspijevaju pronalaziti modaliteti da se obnova i izgradnja ne zaustave. To je rezultat predanog rada, racionalnog usmjeravanja i trošenja budžetskog novca, dobrog pristupa investitorima, uvođenja stimulativnih mjera za razvoj poduzetništva, kontinuiranog dijaloga sa privrednicima, mjesnim zajednicama, udruženjima građana i dr..

Kada je u pitanju cestovna infrastruktura realizirani su slijedeći projekti: sanacija ceste do škole u Dubovom Brdu (19.998,78 KM), sanacija saobraćajnice u ulici 1. maj od „ARE“ prema Plandištu (49.999,45 KM), rekonstrukcija saobraćajnice od šehidskog mosta prema Albaniji (14.998,55 KM), rekonstrukcija ceste od džamije prema naselju Ravan, MZ Nažbilj (19.999,80 KM), sanacija puteva u MZ Ričica (49.999,69 KM), nastavak izgradnje ceste Hrastovac – Starposle (49.999,85 KM), rekonstrukcija dionice ceste od Dubovog Brda do OŠ „Rešad Kadić“ u Brnjicu – klizište (25.066,69 KM), rekonstrukcija ceste u raskrsnici „Grbavica“ i dio ceste od kuće Škulj Midhata do glavne ceste, MZ Varda (20.314,71 KM), sanacija ceste kroz Velike Trnovce (21.863,52 KM), izgradnja puta Alagići – Zgošća, pored sportskog terena (39.999,23 KM), rekonstrukcija puta u naselju Popržena Gora (19.992,27 KM), rekonstrukcija puta u naselju Turalići (29.999,11 KM), rekonstrukcija puta u Sopotnici (59.998,80 KM), rekonstrukcija puta Zagrađe – Halinovići (89.997,09 KM), rekonstrukcija ceste u Brežanima, prema starom selu (49.995,25 KM), rekonstrukcija puta na ulazu u MZ Tršće – Vrtača (19.999,21 KM), rekonstrukcija ceste kroz MZ Nažbilj, Bostašići i Lipnica (39.999,00 KM), rekonstrukcija puteva u MZ Gornja Ričica (29.998,55 KM), rekonstrukcija ceste za Čaluke, MZ Bjelavići (39.999,60 KM), asfaltiranje i sanacija puta za Bištrane (29.991,00 KM), rekonstrukcija puteva u MZ Pope, Rivišća (69.770,00 KM), izgradnja dionice ceste Donji Kakanj – Kondžilo sa nadzorom nad izvođenjem radova - I faza (1.356.385,66 KM). Također ističemo da su za izgradnju novoprojektovane dionice ceste Donji Kakanj – Kondžilo (završna faza) obezbijedena sredstva u iznosu od 1.200.000,00 (Vlada ZDK i Općina Kakanj).

Pored projekata koji su realizovani, napominjemo da su i za većinu drugih projekata cestovne infrastrukture, koji su bili obuhvaćeni programima za 2020. godinu, provedene procedure javnih nabavki i potpisani ugovori o izvođenju radova, tako da su isti spremni za realizaciju početkom 2021. godine (rekonstrukcija puta u MZ Brnj – 19.998,42 KM, rekonstrukcija puta kroz Donji Kakanj, od škole do mosta –

39.991,21 KM, rekonstrukcija putne infrastrukture u MZ Ričica – 80.998,85 KM, rekonstrukcija puta u Bijelim Vodama – 22.863,75 KM, rekonstrukcija puta u naselju Čobe, MZ Bukovlje – 41.565,23 KM, izgradnja trotoara u ulici Paše Kubata, MZ Bukovlje – 21.811,96 KM, sanacija puta u naselju Pedići, MZ Brnjic – 10.391,94 KM, sanacija puta Vinski put, Donji Banjevac – 19.999,80 KM, rekonstrukcija ceste za Lučane, MZ Bilješevo – 49.999,91 KM, rekonstrukcija puta u Jozanovićima, od raskrsnice puta prema Čizmićima – 21.732,88 KM, izgradnja ceste u Rošćevini, MZ Dumanac – 49.998,91 KM, sanacija puta Alagići – Vrbica, MZ Zgošća – 20.553,47 KM, rekonstrukcija ceste kroz Brus – 39.999,19 KM, sanacija pristupnih saobraćajnica od Mosta šehida do džamije u MZ Kakanj II – 11.341,61 KM, rekonstrukcija ceste u MZ Plandište, iznad Poleta – 24.818,27 KM, rekonstrukcija puteva u MZ Varda – 49.900,50 KM, rekonstrukcija ceste Gornje Polje, MZ Bjelavići – 19.997,32 KM, asfaltiranje i sanacija puta za Desetnik – 39.955,00 KM, asfaltiranje puta u Javoru – 15.264,00 KM, završetak radova na izgradnji parkinga kod Veterinarske stanice, rekonstrukcija ceste na Plandištu-denivelacija, sanacija ceste kroz Malješ – industrijski put, završetak radova na izgradnji pristupne saobraćajnice prema stadionu FK “Rudar”, rekonstrukcija ceste u MZ Kakanj II).

Za redovno i vanredno (ljetno) održavanje lokalnih i nerazvrstanih cesta utrošeno je **321.927,45 KM** (obnavljanje i zamjena kolovoznog zastora-asfalt: pristupni put osobi sa invaliditetom u Alagićima – MZ Zgošća, ulica 1. maj – Bare, put za Aliefendiće – Zgošća, Hrastovac – Starposle, Bištrani – Barice, Brežani – put prema starom selu, put za Zajezdu, sanacija puta na lokalitetu klizišta „Vrtača“, ulica ZPO, parking ispred lamele „A“, kod kružnog toka u Centru Kaknja – prokop, put prema Čalucima, Varda, Čatići, Povezice, Sopotnica, Popržena Gora, Rivišća, Poljani – Lučići, Mramor – pristupni put mezarju, MZ Brnj, ulica 309. brdske brigade, Tršće – Ponijeri, Most zlatnih ljiljana i Cementarski most – sanacija asfalta na dilatacionim napravama; ojačanje kolovoza u svrhu obnove i povećanja nosivosti i kvaliteta vožnje-tampon: Dumanac – Rošćevina, Varda, Greben – Hausovići (klanac), pristupni put prema Willoni, Brežani, Bištrani – Seoce, Bištrani – Alispahići, Bištrani – Lukovo Brdo, Slivanj – Hrastovac, Hrastovac – Starposle, Gornja Ričica – Roje, Živalji – Lijeska, Lučani – pristupni put prema kapeli, Tršće – Makljen, Veliki Trnovci, novo naselje Bare, Kraljeva Sutjeska – Teševo, Donja Papratnica – Gornja Papratnica, Gornja Papratnica – Sebinje, Čatići – put za Usjel, Poljani – Gajine, Krševac (Hodžići), Donja Slapnica (Maračići – Kulovići), Bukovlje – put za Čobe, Dumanac – put za Drijenove, Zgošća (Alagići – Crnač), Bijele Vode – pristupni put, put za Bastašiće, Varalići – klizište, Semetiš, Vehabi, Zagrade – Halinovići, Kučići – pristupni put, ulica 311. brigade – pristupne makadamske dionice, Vukanovići – pristupni put za Avdanicu, Bjelavići (Kolonija), put za gornju Lipnicu; održavanje bankina, usjeka i nasipa: ulica ZPO – pored garaža kod Besta, Haljinići – Veliki Trnovci, Brežani – Bištrani, Bukovlje – Demiri, put prema mezarju Skenderovići, put za Subotinje, Greben – Bijele Vode, Zgošća – Vrtača, Haljinići – Seoce; čišćenje kolovoza i objekata za odvodnju: čišćenje rigola i kolovoza Zgošća – Tršće, čišćenje rigola kamenolom Trgošped – Podborje, ulica 1. maj, Tršće (Ivnica, od raskrsnice za Semetiš prema Tršću), iskop i čišćenje kanala Haljinići – Gornja Ričica, Popržena Gora – čišćenje puta i kanala prema kapeli, Brnjic – Laze (čišćenje cijevi), Hausovići – Kamen – Drijen, Tršće – Vukanovići, Haljinići – Seoce – Veliki Trnovci, Greben – Klanac – Bijele Vode; postavljanje zaštitne ograde: Donji Kakanj (put za Donje Tičiče), na lokaciji klizišta „Vrtača“; poboljšanje sistema odvodnje cesta: ljevano željezna rešetka na Vardi, Dumanac – radovi na postavljanju cijevi pored mezarja, klizište „Vrtača“ (izrada odvodnje PEHD cijevima od klizišta do vodotoka Zgošće), izrada cjevastog propusta u Koprivnici, izrada cjevastog propusta u Velikim Trnovcima, Donji Kakanj (Jahorina) – izrada betonskog kanala, ulica Omera Maslića – postavljanje ljevano željezne rešetke i odvod cijevima do vodotoka, ulica 1. maj – postavljanje ljevano željezne rešetke i odvod cijevima do vodotoka, ulica 309. brdske brigade, ljevano željezna rešetka Hrastovac, šaht kod lamele „C“; sanacija potpornih i obložnih zidova uz cestu: most Benat – zamjena talpi, sanacija ležišnih armirano-betonskih greda na mostu Podbjelavići – Ričica, Desetnik – drveni most prema osobi sa invaliditetom, ulica 1. maj – potporni zid na krivini; manji zahvati na saniranju klizišta i odrona: Alagići – Zgošća (proširivanje usjeka na mjestu klizišta), uklanjanje obrušenog kamenog zida Poljani, Brnjic – Starposle (sanacija odrona), kod OŠ Brnjic – sanacija obaloutvrde, Zgošća – Tršće (čišćenje osulina); košenje trave: Tršće – Ponijeri, kamenolom Trgošped – Podborje, put za Dujmoviće, cesta prema Vardi iz pravca Cementarskog mosta; hitne intervencije: uređenje parkinga ispred ski-lifta Ponijeri, radovi na izradi preljevnog betonskog kanala iza sportskog terena u Haljinićima radi sprječavanja plavljenja, prilaz zgradi socijalnog stanovanja, isporuke betona za MZ Krševac (Hodžići), Modrinje, MZ Pope (Kubure). Za sufinansiranje prijelaza puta preko željezničke pruge na području općine Kakanj utrošeno je 6.714,63 KM.

Za održavanje javnih saobraćajnih površina utrošeno je 48.500,11 KM (izrada horizontalne signalizacije u gradu, izrada i postavljanje vertikalne saobraćajne signalizacije u gradu i mjesnim zajednicama, postavljanje i skidanje montažno-demontažnih usporivača brzine na saobraćajnicama, rekonstrukcija stepeništa, ograda, rukohvata...).

Za zimsko održavanje putnih pravaca na području općine Kakanj utrošeno je **452.427,71** KM (210.000,50 KM – grad i prigradske ulice, gradske saobraćajnice i ostale javne površine u gradu; 242.427,21 – lokalne i nerazvrstane ceste na području općine Kakanj).

Za održavanje i modernizaciju javne rasvjete utrošeno je **706.190,35** KM (utrošak električne energije za javnu rasvjetu, te održavanje i rekonstrukcija postojeće javne rasvjete u gradu i mjesnim zajednicama). Realizirani su radovi koji se odnose na proširenje mreže novom LED rasvjetom u slijedećim trafo stanicama: TS Mehmeda Skopljaka, TS Slapnica, TS Varda II, TS Varda I, TS IV juli, TS P+3, TS Plandište, TS Bare, TS Vehabi i TS Brežani. Izgrađena je javna rasvjeta u Hodžićima (15.000,00 KM), u Hrasnicama, MZ Doboj (8.073,00 KM), u selu Kamen (7.722,00 KM), na Ponijerima (80.000,00 KM), LED rasvjeta na Slapnici (24.560,45 KM), LED rasvjeta u Modrinju (34.565,74 KM), LED rasvjeta u MZ Bičer (19.693,27 KM), LED rasvjeta u Zagrađu (14.273,99 KM) i LED rasvjeta u Podborju (20.592,00 KM). Izrađena je i studija „Energetski efikasna rekonstrukcija javne rasvjete na području općine Kakanj (7.020,00 KM). U narednom periodu će biti realizirani ugovoreni projekti javne rasvjete u selu Kamen (8.624,00 KM), u MZ Varda (10.272,60 KM), te MZ Dumanac (22.464,09 KM).

U hidrotehničke objekte (vodovodi, kanalizacije, uređenje obala i korita rijeka) uloženo je **514.716,47** KM, a realizirani su slijedeći projekti: dovršenje vodovoda Brus (59.831,90 KM), izgradnja vodovoda Varalići (121.541,39 KM), izgradnja vodovoda Zagrađe (151.398,64 KM), izgradnja kanalizacije Obre polje (24.101,34 KM), izgradnja kanalizacije Papratnica-faza V (50.568,98 KM), izgradnja vodovoda Koprivnica (49.713,37 KM), kanalizacioni sistem u MZ Haljinići (10.141,87 KM), sanacija desne obale rijeke Ribnice, lokalitet Brnjic (4.995,90 KM), rekonstrukcija pumpne stanice vodovoda Hrastovac (20.000,00 KM), izrada projekta „Uređenje korita rijeke Zgošće – potez most na ulazu u naselje Zgošća – most na izlazu iz naselja Zgošća“ (5.879,00 KM), izrada projekta „Uređenje korita rijeke Trstionica – potez most u naselju Bjelavići – Plavi most u naselju Brežani“ (5.832,00 KM), izrada projekta „Izgradnja kanalizacionog sistema Obre-centar (primarni kolektor fekalne kanalizacije, uređaj za prečišćavanje otpadnih voda i sekundarna mreža) MZ Bjelavići“ (3.100,50 KM), izrada projekta „Izgradnja kanalizacionog sistema Veliki Trnovci (primarni kolektor fekalne kanalizacije, uređaj za prečišćavanje otpadnih voda i sekundarna mreža)“ (3.042,00 KM), izrada Elaborata o zaštiti izvorišta „Ilidža“ (3.941,73 KM), izrada Elaborata o zaštiti izvorišta „Stog“ (3.707,73 KM), izrada projekta rekonstrukcije vodovodnog sistema Gornja Ričica (5.721,30 KM), izmjena i dopuna Glavnog projekta „Rekonstrukcija vodovoda Lučani, MZ Bilješevo“ (1.339,65 KM).

U projekte regulacije desne obale rijeke Bosne nizvodno od Mosta mladih u Kaknju (510.617,00 KM), regulacije lijeve obale rijeke Bosne nizvodno od Mosta mladih u Kaknju (200.000,00 KM), te izgradnje kanalizacionog sistema Haljinići (257.500,00 KM) uloženo je ukupno **968.117,00** KM.

U 2020. godini izgrađena je nadstrešnica za autobusko stajalište u Ulici branilaca (6.999,82 KM). Izvršena je i sanacija doma u Kraljevoj Sutjesci (23.845,71 KM). Također, izgrađena je i još jedna (sedma po redu) zgrada socijalnog stanovanja za socijalno ugrožene porodice Roma.

Za projektovanje, nadzor i tehnički prijem objekata utrošeno je 17.869,28 KM (projekat kanalizacije Čobe, revizija projekata kanalizacije Čobe, Veliki Trnovci i Obre, revizija elaborata izvorišta Ilidža, nadzor kanalizacije Haljinići, nadzor vodovoda Hrastovac i Varalići, revizija glavnog projekta vodovoda Ričica i Lučani, revizija projektne dokumentacije uređenja korita rijeke Zgošće i rijeke Trstionice, nadzor nad izgradnjom dionice puta Donji Kakanj – Kondžilo). Za izradu projektne dokumentacije za most na rijeci Bosni i podvožnjak u Modrinju utrošeno je 28.665,00 KM.

Tokom 2020. godine poduzete su i slijedeće aktivnosti: održavanje urbane opreme u gradu i nabavka nove (46.212,13 KM), održavanje spomen obilježja (10.000,07 KM), obilježavanje naseljenih mjesta, ulica, trgova i označavanje zgrada brojevima (59.893,05 KM), dekoracija općine (13.000,00 KM)...

III ZAŠTITA ŽIVOTNE SREDINE

Općina Kakanj je odlučna u namjeri da kontinuiranim mjerama i akcijama, prostor općine učini još ljepšim i ekološki čistim, te osigura visok nivo komunalne higijene na području cijele općine. U saradnji sa JP “Vodokom” d.o.o. Kakanj realiziraju se aktivnosti na proširenju mreže sistema prikupljanja i odvoza otpada na teritoriji općine Kakanj. Planirano je da se narednih godina povećava opseg odvoza otpada i da u konačnici obuhvati sve mjesne zajednice na području općine.

U 2020. godini Općina Kakanj je realizirala niz ekoloških projekata, te poduzela brojne aktivnosti u cilju zaštite životne sredine:

- Učešće Općine Kakanj u sufinansiranju projekta izgradnje kanalizacionog sistema u slivu rijeke Trstionice u iznosu od **150.000,00** KM, za koji je obezbjeđen dio sredstava apliciranjem na javni poziv Fonda za zaštitu okoliša Federacije BiH (iznos od **100.000,00** KM). Izgrađeni prečištač otpadnih voda je stavljen u funkciju u novembru 2020. godine.

- Uklanjanje ostataka građevine, saniranje lokacije, uređenje zelene površine i ozelenjavanje trga u Kraljevoj Sutjesci (**61.481,18 KM**).
- Učešće u projektu „Čista rijeka Bosna“.
- Uređenje izletišta Bukovica.
- Nastavak aktivnosti na realizaciji projekta „Eko park Tršće“. U prvoj fazi urađen je idejni projekat i izvedeni su zemljani radovi. U drugoj fazi urađene su staze, a u trećoj fazi postavljen mobilijar. Za realizaciju ovog projekta izdvojena su sredstva u iznosu od **50.852,62 KM**.
- Sufinansiranje projekata mjesnih zajednica za aktivnosti na regulaciji kanala otpadnih i oborinskih voda do prihvatljivih recipijenata kroz nabavku cijevi i materijala u iznosu **34.479,50 KM**.
- Povećanje energetske efikasnosti kroz rekonstrukciju krova na zgradi JU za predškolski odgoj i obrazovanje „MLADOST“ Kakanj (100.000,00 KM – Fond za zaštitu okoliša Federacije BiH i 35.323,37 KM – Općina Kakanj).
- Povećanje energetske efikasnosti javnog objekta Dom Vukanovići (20.000,00 KM – Federalno ministarstvo prostornog uređenja i 38.211,91 KM – Općina Kakanj).
- Uspostava procesa integralnog upravljanja otpadom na području općine Kakanj kroz subvencioniranje troškova sakupljanja, transporta i odlaganja kućnog otpada iz udaljenih područja. Odvoz otpada je proširen na MZ Mramor, MZ Nažbilj i MZ Poljani.
- Održavanje i uređenje izletišta, igrališta i zelenih površina u ruralnim dijelovima općine (**12.285,00 KM**).
- Ručno i mehaničko čišćenje, pranje, uklanjanje nečistoća sa gradskih i prigradskih javnih površina i saobraćajnica, održavanje mreže odvodnje atmosferskih voda (**370.000,00 KM**).
- Unapređenje i održavanje javnih gradskih i prigradskih zelenih površina (**117.000,00 KM**).
- Projekti održavanja i poboljšanja higijene kroz popravak i uređenje kontejnera i kontejnerskih mjesta, deratizacija, kafilerijske usluge, te čišćenje vodnih objekata (**80.000,00 KM**).
- Održavanje mobilne stanice.
- Učešće Općine Kakanj u sufinansiranju nabavke uređaja po javnom pozivu Fonda za zaštitu okoliša Federacije BiH (Općini Kakanj su dodijeljena sredstva u iznosu od 50.000,00 KM za realizaciju projekta “Nabavka novih uređaja za kontinuirano praćenje kvaliteta zraka na području općine Kakanj”, dok ovaj projekat Općina Kakanj sufinansira sa iznosom od 28.386,72 KM).
- Promocija i edukacija stanovnika općine u oblasti zaštite okoline putem medija u općini i šire (snimanje i emitiranje radio emisija i eko džinglova u okviru realizacije projekta "Eko čas", pružanje usluga koprodukcije, snimanja montaže i emitovanja emisija, spotova i priloga o ekologiji, realizacija projekta „Edukacija djece-omladina kao aktivni članovi lokalne zajednice“).
- Sufinansiranje projekata za zaštitu okoline NVO (raspisan je javni poziv za dostavljanje projektnih prijedloga u decembru 2020. godine, a nastavak realizacije projekta je u 2021. godini).
- Redovan odvoz komunalnog otpada iz romskog naselja Varda sa dvije lokacije (8.341,74 KM).
- Prijevoz stanovnika općine na Ponijere u periodima povećanih vrijednosti zagađujućih materija u zraku.
- Finansiranje volonterske akcije čišćenja u MZ Dumanac.
- Uređenje i rekonstrukcija korita i obala rijeka i potoka na području općine Kakanj. Vršeno je produbljavanje i čišćenje korita rijeka II kategorije (Trstionica, Ribnica i Zgošća), prema donesenom planu, a nakon obilaska i evidentiranja kritičnih tačaka. Također, vršene su i intervencije na bujičnim potocima koji su stvarali probleme na saobraćajnicama, objektima i sl.
- Izgradnja LED rasvjete u naseljenim mjestima (Krševac, Donji Kakanj, Veliki Trnovci, Seoce, Demiri, Čizmići, Pedići i Brnj).
- Izrada idejnog rješenja proširenja daljinskog grijanja za naselja Povezice, Varda i Plandište.
- Nadogradnja autosmečara sa istresaćem kontejnera sa montiranim kranom za podzemne kontejnere.
- Nastavak rekonstrukcije vrelovoda i dalje širenje mreže daljinskog grijanja (**200.000,00 KM**).
- Sufinansiranje utopljanja javnih objekata i zamjene azbestnih krovova zdravstveno ispravnom vrstom pokrova (pločastim glinenim ili betonskim crijepom, pločama od metalnih limova). Raspisan je javni poziv i zaprimljeno 25 prijava. Formirana je komisija od strane Općinskog načelnika koja je izvršila bodovanje pristiglih aplikacija. Sve pristigle aplikacije su zadovoljile formalno – pravne uslove javnog poziva s tim što dvije aplikacije neće biti sufinansirane iz razloga što traže refundaciju troškova.
- Kupovina poslovnog objekta smještenog uz ski-stazu Ponijeri.
- Utopljanje prostorija hitne pomoći (**35.000,00 KM**).
- Ugradnja podzemnih kontejnera Kraljeva Sutjeska (**25.000,00 KM**).
- Opremanje Ambulante u Krševcu (**30.000,00 KM**).
- Izvođenje radova oko stadiona FK „Rudar“ Kakanj.
- Nabavka mobilijara u MZ Poljani.
- Nabavka kanalizacionih cijevi za MZ Čatići.
- Finansiranje javne tribine o kvalitetu zraka u Kakanju.

- Odvoz otpada sa lokacije Planinarski dom Bočica.
- Izrada banera i snimanje eko poruka.
- Nabavka web baziranog softvera.

Ukupna realizovana sredstva za zaštitu životne sredine iznose **1.180.765,77 KM**, dok ukupna nerealizovana sredstva koja se prenose u 2021. godini iznose 898.648,95 KM. Od iznosa nerealizovanih sredstava zaključeni su ugovori za realizaciju istih u vrijednosti od 377.599,20 KM.

IV KULTURA, SPORT, OBRAZOVANJE, MLADI I NVO

U Kaknju se vodi računa o obrazovanju kroz osiguranje jednakih uslova za sve učenike, tako što se osiguraju besplatni udžbenici za učenike prvih razreda sa tendencijom da isto to imaju svi učenici, da su povećane naknade za porodilje, da imamo najniže cijene usluga predškolskog odgoja i obrazovanja. Svi studenti iz Kaknja imaju obezbijeđene stipendije ili drugu finansijsku podršku kroz studiranje za koju se opredijele. Refundiraju se kamate za stambene kredite mladih ili troškovi ishodovanja dozvola za građenje individualnih stambenih objekata mladih. Izdvajaju se velika sredstva za kulturu i sport što doprinosi da u Kaknju imamo kulturno-sportske sadržaje na zavidnom nivou uz minimalne naknade, kao i najjeftinije skijalište u državi.

Za obilježavanje značajnih datuma i manifestacija utrošeno je **23.222,97 KM**. Svi značajni datumi za Općinu Kakanj, Federaciju BiH i BiH („Dan nezavisnosti BiH“, „Dan državnosti BiH“, „Dan Općine Kakanj“, „Dan Armije BiH“, „Dan policije“, „Nova godina“ značajni datumi i manifestacije iz perioda odbrambeno-oslobodilačkog rata 1992.-1995. godina i NOR-a ...) dostojanstveno su obilježeni, a u skladu sa trenutnom epidemiološkom situacijom. U saradnji sa JU „Kulturno-sportski centar“ Kakanj realizirani su poslovi vezani za manifestacije „Kakanjski dani 2020“ i „Udahni Ponijere 2020“. Za sufinansiranje JU „Gradska biblioteka“ Kakanj izdvojena su sredstva u iznosu od **39.000,00 KM** (sufinansiranje troškova i besplatne upisnine za građane Kaknja).

Izdvajanja Općine Kakanj za sport u 2020. godini iznose **628.899,28 KM**. U toku 2020. godine ostvarena je saradnja sa svim sportskim klubovima i udruženjima iz oblasti sporta kroz razne aktivnosti. Pružena je finansijska podrška u iznosu od 10.000,00 KM za odlazak na državna i federalna prvenstva, međunarodne turnire, evropska i svjetska prvenstva kakanjskih klubova i takmičara (Perfekt fit, Ahmed Krnjić, Centar borilačkih sportova, KBV „Ratnik“, Taekwondo klub NUR, Fight klub Rudar). U saradnji sa JU KSC, Društvom pedagoga i Sportskim savezom općine Kakanj organizovane su Male olimpijske igre za učenike osnovnih i srednjih škola u košarci, odbojci, rukometu i malom nogometu. Učestvovala su sve osnovne i srednje škole. U saradnji sa Sportskim savezom Općine Kakanj realizovana je manifestacija Izbor sportiste općine Kakanj za 2019. godinu. Također, u saradnji sa Sportskim savezom Općine Kakanj izdvojena su sredstva u iznosu od 10.000,00 KM za pomoć klubovima koji su imali obavezu da snimaju utakmice i da se putem live strema utakmice emituju na youtube kanalu, te za snimanje emisija o omladinskim pogonima sportskih klubova i emitovanje istih na lokalnoj televiziji. Izdvojena su i finansijska sredstva u iznosu od 66.306,28 KM, kao pomoć sportskim klubovima usljed pandemije COVID 19. Pružena je pomoć i podrška sportskim klubovima koji su rezultatima izborili plasman u završnice takmičenja Kupa BiH (4.315,00 KM), Brdsko biciklističkom klubu BBK Extreme za odlazak na memorijalni pohod Srebrenica 2020. godina (1.000,00 KM), FK „Rudar“ Kakanj za Izradu monografije FK „Rudar“ povodom 100 godina postojanja kluba (15.246,00 KM), u organizaciji memorijalnog turnira Alija Izetbegović (3.650,00 KM), u organizaciji ulične trka u Kaknju (2.000,00 KM)...

U školskoj 2019/20. godini pravo na povlastice za prijevoz ostvarilo je 148 učenika i 20 studenata, dok u školskoj 2020/21 navedene povlastice ostvaruju 52 korisnika (31.791,10 KM). Općina sufinansira i prijevoz za 15 korisnika JU „Centar za djecu i odrasle osobe sa posebnim potrebama“ u Dobrinji, kao i 4 učenika sa posebnim potrebama koji pohađaju dnevne centre (9.237,00 KM). Za prijevoz učenika srednjih škola na području općine Kakanj za 2020. godinu utrošeno je 6.000,00 KM.

Općina Kakanj svake godine dodjeljuje stipendije i studentima i učenicima srednjih škola, što je rijetkost, jer stipendije za studente obično dodjeljuju kantonalna ministarstva koja su nadležna za oblast obrazovanja, dok su rijetke ili gotovo da nema lokalnih zajednica koje stipendiraju učenike srednjih škola. Za stipendiranje učenika i studenata izdvojeno je **252.500,00 KM** od čega za studentske stipendije 162.500,00 KM, a za stipendiranje učenika 90.000,00 KM. Dodijeljeno je 188 stipendija učenicima po 300,00 KM i 81 stipendija studentima po 800,00 KM. Za 160 studenata koji su ostvarili pravo na kantonalnu stipendiju isplaćena je razlika u iznosu od 32.000,00 KM. Studenti (74) i učenici (76) koji se školuju za deficitarna zanimanja ostvarili su pravo na općinsku stipendiju. Stipendija za studente iznosi 1.500,00 KM, a za učenike 900,00 KM. Na osnovu provedene procedure sufinansirani su i troškovi III ciklusa studija (doktorski studij) studentima sa postignutim najboljim uspjehom (20.000,00 KM). Sve stipendije su isplaćene.

Završena je procedura u vezi konkursa za dodjelu studentskih stipendija koje raspisuje Ministarstvo obrazovanja ZDK, a 160 studenata sa područja naše općine ostvarilo je pravo na stipendiju u iznosu od 600,00 KM (ukupan transfer sa Kantona: 99.000,00 KM). Ovim studentima isplaćena je gore navedena razlika u iznosu od po 200,00 KM.

U uredu Općinskog načelnika organiziran je prijem učenika generacije osnovnih i srednjih škola i izvršena isplata stimulacije za postignuti uspjeh u iznosu od po 200,00 KM, kao i prijem učenika i njihovih nastavnika koji su postigli značajne rezultate na takmičenjima u znanju (izdvojeno 2.440,00 KM).

Za općinsko takmičenje na nivou osnovnih škola iz fizike utrošeno je 822,00 KM, a ostala takmičenja nisu održana zbog pandemije COVID-19.

Općina je podržala i nabavku udžbenika za učenike prvog razreda osnovnih škola, kao i realizaciju projekata osnovnih i srednjih škola u ukupnom iznosu od 19.000,00 KM.

U 2020. godini provedena je procedura prijema 34 lica na stručno osposobljavanje ili pripravnika (VSS) u privatnom sektoru, a koje se finansira iz Budžeta Općine Kakanj.

Općina Kakanj redovno finansira rad Javne ustanove za predškolski odgoj i obrazovanje "Mladost" Kakanj, a obaveza roditelja je da plaćaju samo 50,00 KM mjesečno.

Refundirani su i troškovi boravka djece u privatnim predškolskim ustanovama na području naše općine za školsku 2019/20. godinu. Za 75 korisnika izdvojena su sredstva u iznosu od 49.950,00 KM.

Realizirani su i poslovi vezani za zdravstveno osiguranje redovnih učenika osnovnih i srednjih škola i redovnih studenata do 26. godine života. Odjavljena je 21 osoba, prijavljeno 17 osoba na privremeno zdravstveno osiguranje, a sve u skladu sa uputstvom Ministarstva za obrazovanje i Ministarstva za rad i socijalnu politiku ZDK.

Za sufinansiranje kamata za stambeno zbrinjavanje mladih i refundiranje troškova ishodovanja rješenja za izgradnju/saglasnosti koje vrijedi kao rješenje za izgradnju izvojeno je 30.000,00 KM. Utrošeno je 14.022,38 KM za subvenciju i refundaciju za 11 korisnika.

Finansijski je podržan i rad nevladinog sektora, te omladinski projekti. Za omladinske projekte planirana su sredstva u iznosu od 10.000,00 KM. Javni poziv je proveden po ReLOaD metodologiji, a odobrena su 3 projekta, te realizovano 8.505,00 KM. Za projekte ostalih udruženja planirano je 20.000,00 KM. Javni poziv je proveden po ReLOaD metodologiji, a odobrena su 4 projekta, te realizovano 16.000,00 KM. Za projekte i podršku radu udruženjima nacionalnih manjina sa područja općine Kakanj planirano je 10.000,00 KM. Javni poziv je proveden po ReLOaD metodologiji, a odobren je 1 projekat, te realizovano 5.000,00 KM. U narednom periodu, zajedno sa mladima nastavljamo organizirati sportska takmičenja i sadržaje za mlade, te sponzorirati njihove aktivnosti (izložbe, revije, omladinska poduzetništva i sl.). Nastavlja se i saradnja sa udruženjima mladih, Vijećem mladih i Komisijom za mlade.

Također, vjerskim zajednicama su obezbijeđena sredstva u općinskom budžetu (**25.500,00 KM**), te pružen svaki drugi vid potrebne podrške.

V BORAČKO – INVALIDSKA, ZDRAVSTVENA I SOCIJALNA ZAŠTITA

Iako nadležnost za pružanje pomoći boračkim populacijama imaju ministarstva za boračka pitanja ZDK i Federacije BiH, Općina Kakanj nastoji da iz svog budžeta pomogne ovoj populaciji. Nastavljena je aktivna podrška boračkim udruženjima i porodicama učesnika u odbrani od agresije koja je izvršena na BiH. Budžetom Općine Kakanj za 2020. godinu usvojen je iznos od 160.510,00 KM za rad i pomoći boračkim udruženjima, te je utrošen iznos od 111.492,00 KM za redovan rad udruženja, za neplanirane troškove iznos od 9.281,00 KM, dok je za pomoći utrošen iznos od 34.103,00 KM. Za jednokratne novčane pomoći za nezaposlene pripadnike boračke populacije ukupno je isplaćeno 60.900,00 KM. Za novčane pomoći za liječenje demobiliziranih branilaca u toku 2020. godine utrošeno je 3.950,00 KM, za novčanu pomoć za liječenje van kantona za nezaposlene demobilizirane branioce u toku 2020. godine 422,00 KM, a za alternativni smještaj boračkih populacija-kirije 900,00 KM.

U 2020. godini sa **federalnog nivoa** korisnicima iz Kaknja, po osnovu porodičnih i ličnih invalidnina, isplaćeno je 1.842.821,16 KM, za novčanu egzistencijalnu naknadu za demobilizirane branioce starije od 57 godina isplaćeno je 359.810,00 KM, a za dobitnike najvećih ratnih priznanja ukupno je isplaćeno 94.648,88 KM. Sa **kantonalnog nivoa** realizirano je ukupno 490.100,80 KM (6.600,00 KM – vanredna novčana pomoć, 63.150,00 KM – liječenje, 13.800,00 KM – kupovina udžbenika, 23.640,00 KM – troškovi dženaze/sahrane, 251.600,00 KM – boračke stipendije za studijsku 2019/20. godinu, 89.500,00 KM – stambeno zbrinjavanje, 23.300,00 KM – samozapošljavanje i upošljavanje, 510,80 KM – nabavka ortopedskih pomagala).

Ministarstvo za boračka pitanja ZDK odobrilo je Sportskom društvu RVI „Kakanj 92“ 3.000,00 KM za nabavku vazdušnih pušaka, 5.000,00 KM za sufinansiranje izgradnje spomen obilježja Spomen šehidska

česma u MZ Brnj, 5.000,00 KM za sufinansiranje rekonstrukcije spomen obilježja u MZ Brnjic, te 5.000,00 KM za sufinansiranje rekonstrukcije spomen obilježja u MZ Doboj.

Svi značajni datumi i manifestacije iz perioda odbrambeno-oslobodilačkog rata 1992.-1995. godina i NOR-a (obilježavanje dana „Armije RBiH“, dana „Zlatnih ljiljana“, „Dana patriotske lige“, spomena „Kamenica-Popova Luka“, spomena „Misoča“, spomena „Semizovac“, dana „RVI“, godišnjice 309. brdske brigade, dana poginulih civila Hrvata-Grmače 1993, dana poginulih civila Bošnjaka-Poljani 1993, 27. jula – Dana ustanka naroda i narodnosti BiH, godišnjice formiranja OPŠO i 311. lahke brigade, organizovanje obilježavanja spomena Srebrenica, obilježavanje godišnjice 7. muslimanske brigade, organizacija turnira za Dan šehida i poginulih boraca i dr.) u Kaknju se obilježavaju na dostojanstven način, a glavni finansijer organizacije obilježavanja je Općina Kakanj.

U saradnji sa NTV „IC“ Kakanj, Općina je sufinansirala Projekat „Da se ne zaboravi“ u iznosu od 5.000,00 KM. Potpisanim Memorandumom o razumijevanju, broj: 01-02-3-1074/19 od 06.12.2019 godine s ciljem podrške radu Memorijalnog centra Srebrenica Potočari odobrena su i realizovana sredstva u iznosu od 10.000,00 KM.

Za sufinansiranje Službe hitne medicinske pomoći opredijeljena su sredstva u iznosu od 40.000,00 KM (za rad jednog tima treće smjene Hitne medicinske pomoći). S ciljem poboljšanja zdravstvene slike stanovništva, u saradnji sa JU „Dom zdravlja“ Kakanj realiziran je projekat „Besplatan ultrazvučni pregled dojki“ za 200 žena. Vrijednost projekta je 5.000,00 KM.

Zajedno sa JU „Centar za socijalni rad“ Kakanj nastavlja se pružati podrška socijalno ugroženim kategorijama stanovništva naše općine (stalna novčana pomoć, druge materijalne pomoći, osiguranje jednog obroka dnevno u vrijeme nastave, troškovi sahrane, smještaj u JU za predškolski odgoj „Mladost“ Kakanj i dr.) Iz Budžeta Općine Kakanj izdvajaju se značajna novčana sredstva za stalnu socijalnu pomoć. Putem Centra za socijalni rad Kakanj, isplaćuju se jednokratne novčane pomoći za porođaj (stimulacija nataliteta) i opremu novorođenog djeteta.

Općina pruža finansijsku podršku humanitarnim organizacijama. Osigurali smo sredstva za rad javne kuhinje „Merhamet“, namijenjena najugroženijoj kategoriji stanovništva (41.250,00 KM), te opredijelili sredstva u iznosu od 10.000,00 KM za nabavku hladnjače. Za rad Crvenog križa u 2020. godini iz Budžeta Općine Kakanj izdvojena su sredstva u iznosu od 7.500,00 KM.

Radno sposobna socijalno ugrožena lica, podržavamo podsticajima za samoupošljavanje u poljoprivredi ili obrtu.

U 2020. godini realizirani su i poslovi vezani za zdravstveno osiguranje učenika i studenata, samohranih majki i djece do polaska u školu.

Udruženjima oboljelih i invalidnih lica sa područja općine Kakanj odobrena su sredstva u iznosu 8.765,94 KM. Udruženju dijabetičara „Slatki život“ Kakanj, za nabavku senzora za mjerenje šećera u krvi za djecu oboljelu od dijabetesa, odobren je iznos od 7.000,00 KM.

Za pomoć članovima Udruženja penzionera općine Kakanj izdvojena su i realizovana sredstva u iznosu od 37.500,00 KM. Sredstva su namijenjena za plaćanje troškova električne energije, vode, kanalizacije, grijanja i nabavku ogreva.

Za subvencije komunalnih usluga stanovništvu u stanju socijalne potrebe je realizovano 15.000,00 KM.

Nastavili smo sa realizacijom projekta „Stambeno zbrinjavanje Roma na području općine Kakanj“, a u saradnji sa Ministarstvom za ljudska prava i izbjeglice BiH i organizacijom Caritas Švicarska (realiziran projekat izgradnje 7 stambene zgrade sa 10 stanova u naselju Varda, te organizovano useljenje korisnika stanova – 46 članova domaćinstava).

Općina Kakanj pruža finansijsku podršku „Dnevnom centru za djecu i odrasle osobe sa posebnim potrebama ZDK“ u Visokom (45.204,52 KM) i UG „Medica“ Zenica (5.911,59 KM – sufinansiranje sigurne kuće, odnosno projekta „Zbrinjavanje žrtava nasilja u porodici“).

U 2019. godini na području općine Kakanj je počela izgradnja višestambene zgrade sa 20 stambenih jedinica namijenjenih za smještaj socijalno ugroženih porodica, izbjeglica i raseljenih lica, po principu socijalnog neprofitnog stanovanja u okviru Državnog projekta stambenog zbrinjavanja (DPSZ) Regionalni stambeni program (RSP) za Pod-projekat BiH3. Nakon završenih svih poslova i procedura svečano otvaranje zgrade, dodjela ključeva i useljavanje 20 korisnika u istu, izvršeno je krajem augusta 2020. godine.

U okviru Regionalnog stambenog programa Pod-projekat Državnog projekta stambenog zbrinjavanja (DPSZ – BiH5), nakon završenih procedura, utvrđena je lista korisnika navedenog projekta na kojoj se nalaze 3 korisnika sa područja općine Kakanj.

Na Javni poziv za podnošenje prijave za programe pomoći održivog povratka „Izgradnja i sanacija infrastrukturnih i drugih objekata od značaja za širu društvenu zajednicu u mjestima povratka na prostoru BiH u periodu 2020. i 2021. godine“, Općina je aplicirala sa projektom pod nazivom „Sanacija klizišta (odrona) na putnoj komunikaciji Alagići-Čizmići“ koji je na Konačnoj listi potencijalnih korisnika navedenog programa.

Pravo na privremeni smještaj plaćanjem stanarine za raseljene osobe koje su deložirane, nemaju mogućnost povratka, a i dalje ispunjavaju uslove za alternativni smještaj ostvarila su 4 korisnika (2.040,00 KM). Jednokratna novčana pomoć raseljenim licima i povratnicima (teška ekonomska situacija, bolest, smrtni slučaj i dr.) odobrena je za 11 korisnika (2.400,00 KM).

Budžetom Općine Kakanj za 2020. godinu, planirana su i realizovana sredstva za pomoć raseljenim licima i povratnicima (2.660,00 KM), transfer neprofitnim organizacijama-obnova i povratak (24.270,50 KM), te finansijsko učešće Općine Kakanj u izgradnji zgrade socijalnog stanovanja (130.115,81 KM).

VI CIVILNA ZAŠTITA I SIGURNOST GRAĐANA

Od mjeseca marta 2020. godine, Općinski štab civilne zaštite poduzeo je brojne aktivnosti u okviru sveukupne borbe protiv širenja koronavirusa. U skladu sa odlukama Općinskog štaba civilne zaštite izvršene su izmjene i dopune svih programa o utrošku sredstava i veći dio sredstava je preusmjeren za borbu protiv koronavirusa, odnosno nabavku neophodnih sredstava (zaštitne opreme) za zaštitu stanovništva. Općinski štab civilne zaštite donio je:

- Odluku o utrošku sredstava posebne naknade za zaštitu i spašavanje radi provođenja obavezne preventivne dezinfekcije javnih ustanova i javnih površina, broj: 0-04/1-17/20 od 17.03.2020. godine (5.000,00 KM) kojom je zadužio Zavod za planiranje i izgradnju općine Kakanj da angažira Higijensko-epidemiološku službu Doma zdravlja Kakanj sa ciljem provođenja obavezne (preventivne) dezinfekcije slijedećih objekata i javnih površina: zgrada Općine, zgrada Policijske stanice, zgrada Općinskog suda, rukohvati, igrališta i druge javne površine.
- Odluku o utrošku sredstava posebne naknade za zaštitu i spašavanje, broj: 0-04/1-18/20 od 17.03.2020. godine (6.000,00 KM) u svrhu nabavke sredstava za ličnu dezinfekciju lica angažiranih na provođenju mjera prevencije, te za dezinfekciju prostora kojima upravljaju javne ustanove.
- Odluku o utrošku sredstava posebne naknade za zaštitu i spašavanje, broj: 0-04/1-19/20 od 17.03.2020. godine (7.000,00 KM) u svrhu nabavke neophodne zaštitne opreme sa ciljem jačanja postojećih resursa (zaštitna odijela, 2.000 maski...).
- Odluku o utrošku sredstava posebne naknade za zaštitu i spašavanje, broj: 0-04/1-20/20 od 17.03.2020. godine (50.000,00 KM) u svrhu nabavke neophodne medicinske opreme za potrebe JU „Dom zdravlja“ Kakanj (respirator i druga neophodna medicinska oprema).
- Odluku o utrošku sredstava zaštite i spašavanja, broj: 0-04/1-27/20 od 26.03.2020. godine (40.000,00 KM) u cilju opremanja izolacionog centra za smještaj eventualno oboljelih (nabavljeno 50 kreveta, 150 jastuka, 200 posteljina i 100 jorgana). Pored navedenog na raspolaganje je stavljeno i 30 kreveta Crvenog križa općine Kakanj. Ovi kapaciteti bi se aktivirali u slučaju pojave većeg broja oboljelih i situacije u kojoj kapaciteti Kantonalne bolnice Zenica ne bi bili dovoljni.
- Odluku o utrošku sredstava posebne naknade za zaštitu i spašavanje, broj: 0-04/1-21/20 od 19.03.2020. godine (5.000,00 KM) radi nabavke neophodne zaštitne opreme (200 zaštitnih odijela, 1.471 maska, 23 pakovanja rukavica).
- Odluku o utrošku sredstava posebne naknade za zaštitu i spašavanje, broj: 0-04/1-22/20 od 23.03.2020. godine (5.000,00 KM) za Crveni križ općine Kakanj u svrhu nabavke hrane i drugih potrepština za građane u stanju socijalne potrebe za vrijeme pandemije.
- Odluku o utrošku sredstava posebne naknade za zaštitu i spašavanje, broj: 02/1-2192/20 od 26.03.2020. godine (6.000,00 KM) radi nabavke neophodne zaštitne opreme od firme „Inkos export-import“ d.o.o. Kakanj.
- Naredbu o angažovanju firme „Inkos export-import“ d.o.o. Kakanj da cjelokupnu svoju proizvodnju preusmjeri za potrebe zaštite i spašavanja (jednokratna i višekratna odijela, maske i dr.), za potrebe JU „Dom zdravlja“ Kakanj, PS Kakanj, te općinskih službi organa uprave Općine Kakanj. Realizovana je nabavka 500 zaštitnih odijela i 2.000 zaštitnih maski za lice (odluka o utrošku sredstava posebne naknade za zaštitu i spašavanje, broj: 0-04/1-23-1/20 od 24.03.2020. godine – 25.155,00 KM).
- Odluku o utrošku sredstava zaštite i spašavanja, broj: 0-04/1-26/20 od 25.03.2020. godine (5.000,00 KM), u svrhu nabavke prehrambeno-higijenskih paketa za romsku populaciju (putem Udruženja „Romalen“ Kakanj).
- Naredbu o angažovanju Službe za logistiku, broj: 0-04/1-29/20 od 26.03.2020. godine, formirane pri TD „NOVA TRGOVINA –S“ d.o.o. Kakanj, a radi obezbjeđivanja određenih količina zaliha robe u vrijednosti 50.000,00 KM (brašno – 15.000 kg, ulje suncokret – 1.000 l, so kuhinjska – 1.000 kg, sardina u ulju konzerva 125 g. – 1.000 kom., goveđi narezak 150 g. – 500 kom., toalet sapun 75 g. – 2.000 kom., grah bijeli – 350 kg). Roba je smještena u magacin zgrade bivšeg štaba TO koja je sada sjedište Operativnog centra civilne zaštite i udruženja od interesa za zaštitu i spašavanje sa odgovarajućim

skladišnim kapacitetom. Dogovoren je i modalitet izuzimanja roba sukcesivno shodno potrebama, a višak robe će ostajati u skladištu TD „NOVA TRGOVINA – S“ d.o.o. Kakanj.

- Odluku o nabavci dva tunela za dezinfekciju, broj: 0-04/1-39/20 od 02.04.2020. godine (5.000,00 KM), a koji su postavljeni ispred pošte, te u krugu JU „Dom zdravlja“ Kakanj.
- Odluku o finansiranju rada Crvenog križa općine Kakanj (1.500,00 KM), te dodjeli finansijske pomoći Udruženju žena općine Kakanj (2.000,00 KM), čije su članice u vrijeme pandemije šile maske za sve učenike osnovnih škola na području općine Kakanj.

Formiran je i Tim za praćenje logističke podrške, upućen apel apotekama na području općine Kakanj da formiraju mobilne timove za dostavu lijekova za osobe starije životne dobi, za bolesne, za posebno ugrožene grupe stanovništva, za sve one koji nisu u mogućnosti da se kreću (zbog zabrane kretanja, bolesti, iznemoglosti..), upućen apel i preporuke građanima za redovno provođenje higijensko-epidemioloških mjera u cilju prevencije i suzbijanja širenja koronavirusa COVID 19...

U 2020. godini, nakon adaptacije i uređenja zgrade štaba TO, izvršeno je useljenje i smještaj udruženja od značaja za zaštitu, kao i opremanje prostorija operativnog centra Civilne zaštite.

Služba civilne zaštite u saradnji sa TUN-timom, KUCZ i PS Kakanj vrši redovno obilježavanje i uklanjanje pronađenog zaostalog NUS-a. U toku 2020. godine prikupljeno je i predato: 24 ručne odbrambene bombe, 2 tomblonske mine, 1 ručna kumulativna bomba i 50 komada sitne municije.

U više navrata vršena je obuka stanovništva putem javnih emitera na području općine Kakanj, u vidu obavještenja, upoznavanja sa propisima iz oblasti zaštite od požara i vatrogastva, kao i zaštite i spašavanja od prirodnih ili drugih nesreća. Pored toga ostvarena je i saradnja sa udruženjima Radio-klub, Crveni križ općine Kakanj, Udruženje „Vatrogasno društvo Kakanj“ u vršenju obuke stanovništva na zaštiti i spašavanju.

Općina Kakanj je odbarana od strane UNDP BiH i učestvuje u zajedničkom programu Vlade Švicarske i Ujedinjenih nacija u oblasti smanjenja rizika od katastrofa (DRR). Kroz program će biti obuhvaćeno pet oblasti i to: zaštita i spašavanje, obrazovanje, socijalna zaštita, zdravstvo i školstvo, a za realizaciju ovog programa formirana je lokalna platforma za smanjenje rizika od katastrofa i predviđeno je da program traje do 2022. godine.

Na osnovu „Projekta za oporavak od poplava“ iz 2019. godine, u saradnji sa UNDP, izvršena je sanacija dva stambena objekta sa rezervne liste (Gačić Fahrudin i Bajramović Senad iz naselja Povezice).

Općinski štab civilne zaštite odobrio je sredstva MZ Pope (1.000,00 KM) za nabavku kanalizacionih korugiranih cijevi za odvodnju otpadnih i oborinskih voda, a u cilju zaštite novoizgrađenog puta u ovoj mjesnoj zajednici. Odobrena je i finansijska pomoć za porodice Bajrić Senada iz naselja Luke (3.000,00 KM) i Mujić Adema iz naselja Crnać (2.000,00 KM) čiji su stambeni objekti pretrpjeli štetu usljed požara. Klubu spasilaca – GSS Kakanj odobrena je pomoć u iznosu od 1.500,00 KM za obuku svojih članova i rad kluba. Odobrena su i sredstva Službi za medicinsku pomoć (5.000,00 KM) i Službi za čistoću, vodosnabdijevanje i asanaciju terena (3.000,00 KM) za nabavku potrebne opreme za rad ovih službi zaštite i spašavanja.

Izvršena je nabavka potrebne opreme za Profesionalnu vatrogasnu jedinicu (PVJ) u iznosu od 16.000,00 KM (kompresor za punjenje izolacionih aparata, vatrogasne uniforme i zaštitne cipele).

Na osnovu zakonske regulative koja se odnosi na zaštitu i spašavanje izvršeno je ažuriranje Procjene i Plana zaštite i spašavanja. Izrađen je i Elaborat istražnih radova na klizištu Vrtača – Tršće.

U skladu sa Odlukom o organizovanju i funkcionisanju zaštite i spašavanja izvršeno je ažuriranje i popuna svih službi zaštite i spašavanja. Poduzete su i aktivnosti na širenju mreže i ustrojavanju povjerenika civilne zaštite u svim mjesnim zajednicama na području općine Kakanj.

U 2020. godini PVJ je imala 204 intervencije (16-stambeni objekat, 5-pomoćni objekat, štala, garaža i sl., 18-dimnjaci, 115-šumski požar i nisko rastinje, trava, 7-poplave i druge nesreće, 6-požar na vozilima i saobraćajni udesi, 37-tehničke intervencije – kontejneri, smeće, gume, sijeno, otključavanje stana, sapiranje, prijevoz vode itd.). Na svim intervencijama PVJ je bila pravovremena, uspješna i efikasna do završetka akcije. U poređenju sa prethodnom godinom došlo je do povećanja ukupnog broja intervencija, a posebno kada je u pitanju gašenje šumskih požara, niskog rastinja i trave. Učešće pravnih lica iz oblasti šumarstva koja gospodare i čuvaju šume u 2020. godini je više nego skromno, i u oblasti prevencije i u oblasti represije, te utvrđivanja identiteta lica koja izazivaju ove požare, a skromni su i njihovi kapaciteti u oblasti vatrogastva.

VII LOKALNA UPRAVA – OPĆINSKE SLUŽBE KAO SERVIS GRAĐANA

U proteklom periodu uspostavljena je efektivna, efikasna i odgovorna općinska uprava prilagođena potrebama građana i poslovnih subjekata, kako bi efikasnije i jednostavnije ostvarivali svoja prava i izvršavali svoje obaveze. Razvijajući koncept savremenih administracija koji kaže “Putuju podaci, a ne građani”, odnosno uspostavljanjem elektronske uprave poboljšali smo protok informacija unutar administracije, te

prema građanima i poslovnim subjektima. Imamo neposredan uvid u trajanje svakog predmeta, kao i grupa predmeta po uposlenim, po odjelima i službama, kao i administraciju u cjelini.

Općinu Kakanj su posjetili brojni predstavnici diplomatskog, političkog, privrednog i kulturnog života. Općinski načelnik je svakodnevno u svom uredu održavao sastanke sa predstavnicima svih relevantnih institucija koje mogu pomoći u realizaciji razvojnih planova u općini Kakanj (693 prijema u Kabinetu Općinskog načelnika).

Uzeli smo aktivno učešće i u radu Saveza općina i gradova Federacije BiH, te nastavili saradnju sa drugim općinama, kako u zemlji tako i u inostranstvu.

Na inicijativu i poziv Predsjednika Okruga Ležajsk (Republika Poljska), delegacije općina Kakanj, Novo Sarajevo i Konjic boravile su u studijskoj posjeti Okrugu Ležajsk, kojeg čine pet općina, a u cilju razvijanja i jačanja veza između lokalnih zajednica Evropske unije, uspostave i održavanja partnerskih i prijateljskih odnosa, te razmjene iskustava i informacija u oblastima privrede, kulture, obrazovanja, sporta, turizma, socijalne politike i dr., kao i provedbe zajedničkih projekata. Veliku ulogu, doprinos i pomoć u realizaciji ove posjete dale su Fondacija „Solunska braća – Ćirilo i Metodije” iz Poljske i Fondacija „Bosnian Representative Association for Valuable Opportunities – BRAVO” iz BiH, koje su kao partnerske organizacije, realizirale brojne projekte koji se finansiraju iz fondova Evropske unije. Ističemo da Republika Poljska trenutno predsjedava Berlinskim procesom, a do sada je povukla skoro najveća sredstva iz fondova Evropske unije. Delegacije Kaknja, Novog Sarajeva i Konjica su posjetile gradove Rzeszów (glavni grad regiona) i Przemysł, te općine Ležajski i Nowa Sarzyna. Tokom posjete održani su brojni sastanci, a posebno izdvajamo sastanke s upravom Okruga Ležajsk, te poduzetnicima iz Okruga Ležajsk (Browar, Ciech, Hortino, BMF Polska, Fabryka Maszyn, Elektrociepłownia Nowa Sarzyna, Silikony, Styropianek, Agencja Nieruchomości Alicja, Stare Miasto Park, PSS Społem, Spółdzielnie Socjalne: Bajkolandia, z Giedlarowej), na kojima su predstavljene općine Kakanj, Novo Sarajevo i Konjic, te prezentirani njihovi prirodni, privredni, turistički i drugi potencijali, kao i mogućnosti za investiranje u pomenutim općinama. Načelnici Kaknja, Novog Sarajeva, Konjica, Ležajska i Przemysła, Predsjednik Okruga Ležajsk, te predstavnici Fondacije „Solunska Braća – Ćirilo i Metodije” iz Poljske i Fondacije „Bosnian Representative Association for Valuable Opportunities – BRAVO” iz BiH potpisali su pismo namjere o budućoj saradnji, a posljednjeg dana posjete, predsjednik Okruga Ležajsk i načelnik Općine Kakanj potpisali su poseban dokument o budućoj saradnji između Okruga Ležajsk i Općine Kakanj, te dogovorili konkretne aktivnosti u vezi realizacije određenih projekata koji se finansiraju iz EU fondova, posjete kakanjskih poljoprivrednika Poljskoj, razmjene učenika, uzvratne posjete delegacije Okruga Ležajsk Kaknju...

U protekloj godini pokrenut je 5.431 prvostepeni upravni postupak (4.606 na zahtjev stranke i 825 po službenoj dužnosti).

Bez obzira na izazove i poteškoće koje je donijela pandemija COVID 19, prijemna kancelarija Općine Kakanj, kao i terenski matični uredi, od početka pandemije do danas su radili u punom kapacitetu. U Centru za pružanje usluga izvršeno je 135.758 ovjera potpisa, rukopisa i prijepisa, izdato 24.500 izvoda iz matičnih knjiga, izvršena 403 upisa u matičnu knjigu rođenih, 221 upis u matičnu knjigu vjenčanih, te 486 upisa u matičnu knjigu umrlih. Završeno je ažuriranje centralnog biračkog spiska Općine Kakanj, te pružena je stručna, tehnička i administrativna pomoć OIK-i na provođenju Lokalnih izbora 2020. godine. Ažuriran je Izvještaj o infrastrukturnim potrebama mjesnih zajednica općine Kakanj za naredni period.

U 2020. godini Odsjek za inspekcije je izvršio ukupno 5.861 inspeksijsku radnju. U RNKIPE je unesen 191 prekršajni nalog, a ukupna vrijednost novčanih kazni u 2020. godini koje se uplaćuju u budžet iznosi 27.170,60 KM. Poduzeto je 488 preventivnih i 244 represivne mjere. Po planu inspeksijskog nadzora poduzeta su 303 inspeksijska pregleda, dok je po zahtjevu/inicijativi građana poduzet 331 inspeksijski pregled. Po anonimnim prijavama građana poduzeta su 193 inspeksijska pregleda. Uklonjeno je 25 predmeta i 9 građevina. Izdato je 14 sanitarnih saglasnosti i 2 sprovednice (odobrenja za ekshumaciju), te 120 rješenja o obavezi registracije vlasničkih pasa. U toku izvještajnog perioda izdato je 3.412 rješenja o zabrani kretanja, odnosno za samoizolaciju lica koja su bila ili u kontaktu sa oboljelim ili su oboljela od koronavirusa.

Odsjek za imovinsko-pravne i stambene poslove rješavao je 2 predmeta utvrđivanja javnog interesa, 47 potpune eksproprijacije, 30 nepotpune eksproprijacije, 2 deeksproprijacije, 1 upis u javne knjige nekretnina, 3 prijedloga za obnovu postupka eksproprijacije, 6 predmeta prodaje nekretnina u skladu sa Zakonom o stvarnim pravima Federacije BiH, 3 predmeta uspostave prava služnosti, 1 predmet nabavke nekretnine, 12 predmeta utvrđivanja prava vlasništva po članu 61. Zakona o građevinskom zemljištu Federacije BiH, 2 zahtjeva za dodjelu poslovnih prostora bez naknade, 1 predmet dodjele zemljišta, 12 predmeta ispravke greške u katastarskom operatu, 6 zahtjeva za vraćanje imovine u vlasništvo građana, 2 zahtjeva za prijenos stanarskog prava, 1 zahtjev za vraćanje stana vlasniku. Zaključena su i 2 ugovora o upravljanju stambenim zgradama (ukupno do sada zaključeno 143 ugovora o održavanju i upravljanju stambenim zgradama)... Odsjek je radio i na realizaciji projekta izgradnje sedme stambene zgrade socijalnog stanovanja sa 10 stanova u naselju Varda u saradnji sa “Caritasom” Švicarske.

U Odsjeku za geodetske poslove i katastar nekretnina u toku su aktivnosti na harmonizaciji 4 katastarske općine (Bjelavići, Bukovlje, Bićer i Zgošća) sa cca 8.000 parcela za pilot-projekat Federalne geodetske uprave (FGU). U toku 2020. godine izvršeno je 100 cijepanja parcela na terenu, 29 uplanjenja objekata, 103 snimanja situacije, 38 promjena kulture, 11 usklađenja starog i novog premjera, 14 identifikacija parcela (stari-novi premjer), 2 uređenja međa na terenu, 221 promjena podataka posjednika, 140 objedinjavanja upisa posjednika, provedeno 183 rješenja o nasljeđivanju, 342 ugovora, 61 geodetski elaborat, izdato 700 uvjerenja o posjedovanju nekretnina po raznim osnovama, 2.683 prijepisa posjedovnih listova, 796 kopija plana, 311 kopija plana i posjedovnih listova (opcija ispis više dokumenata)... U 2020. godini od strane firme „Gauss“ d.o.o. Tuzla, a u saradnji sa FGU izvršena je obuka za uspostavu digitalnog arhiva, a čija implementacija počinje u 2021. godini. U koordinaciji sa FGU instaliran je program za unos novih kućnih brojeva tzv. adresni registar i obrađeno je oko 4.000 rješenja koja će biti dostavljena u MUP na daljnji postupak, uz napomenu da će se i ostatak obraditi kako budu dolazili podaci sa terena. Zavod za planiranje i izgradnju općine Kakanj vrši postavljanje novih pločica sa brojevima i istovremeno vrši evidenciju koju dostavlja nadležnoj službi, te se ista unosi u program.

U 2020. godini donešeno je 103 rješenja o urbanističkoj saglasnosti, 121 rješenje o korištenju javnih površina, 47 rješenja o odobrenju za građenje, 14 rješenja o odobrenju za upotrebu objekta-tehnički prijem objekata, 184 rješenja o legalizaciji bespravno sagrađenih objekata, te izdato 234 uvjerenja o činjenicama o kojima se vodi evidencija, o starosti objekta i dr.. U Odsjeku za urbanizam izrađena je Odluka o visini prosječne konačne građevinske cijene jednog metra kvadratnog korisne stambene površine iz prethodne godine, Odluka o usvajanju izmjene i dopune Prostornog plana općine Kakanj za period 2010-2030., Odluka o provođenju izmjene i dopune Prostornog plana općine Kakanj 2020.-2030. ...

U Odsjeku za lokalni ekonomski razvoj izdato je ukupno 152 rješenja, 27 uvjerenja i 6 zaključka o obustavljanju postupka, i to u slijedećim oblastima: trgovina (13 odobrenja za rad, 14 rješenja o trajnoj odjavi djelatnosti i 4 rješenja o promjeni rada i proširenja predmeta poslovanja), ugostiteljstvo (4 odobrenja za rad, 6 rješenja o trajnoj odjavi djelatnosti i 4 rješenja o utvrđivanju minimalnih uslova u poslovnom prostoru), obrt i srodne djelatnosti (38 odobrenja za rad - 28 rješenja iz oblasti obrta i srodnih djelatnosti i 10 rješenja o obavljanju poljoprivredne djelatnosti, te 25 rješenja o trajnoj odjavi djelatnosti), javni prijevoz tereta (2 odobrenja za rad, 2 rješenja o trajnoj odjavi djelatnosti i 16 rješenja o promjeni rješenja radi promjene vozila), prijevoz za vlastite potrebe (9 rješenja o obavljanju djelatnosti prijevoza, 1 rješenje o trajnoj odjavi djelatnosti i 1 rješenje o promjeni vozila), taksi prijevoz (3 odobrenja o obavljanju djelatnosti, 1 rješenje o trajnoj odjavi i 8 rješenja o promjeni vozila). U oblasti saobraćaja izdato je 48 dopunskih oznaka za taksivozila, 10 uvjerenja o ispunjavanju uslova za dodjelu dopunskih oznaka za taksivozila, 22 uvjerenja o izdatim dopunskim oznakama za taksivozila, 5 rješenja za prekopavanje ceste, 12 rješenja za ograničavanje saobraćaja, 13 rješenja za izvođenje radova na cestama, 33 rješenja za privremeno korištenje cestovnog zemljišta, 9 rješenja za postavljanje saobraćajne signalizacije, 1 rješenje za izdavanje saglasnosti za lokaciju, te 7 zaključka o obustavi postupka. Realizirane su aktivnosti vezane za provođenje postupka rasporeda taksivozila na taksistajalištima na području općine Kakanj za 2018. godinu (44 taksi prijevoznika). Pokrenut je i postupak usklađivanja i registracije redova vožnje za linijski prijevoz putnika na općinskim autobusnim linijama na području općine Kakanj, postupak izmjene Odluke o organizaciji i sigurnosti saobraćaja na putevima, te postupak raspisivanja Javnog poziva za prikupljanje zahtjeva za raspored taksivozila na slobodna taksistajališta na području općine Kakanj. U Službeni Registar pasa Općine Kakanj u 2020. godini upisana su 63 psa, a ukupno je do sada upisano 747 pasa.

U Odsjeku za boračka pitanja donešeno je 26 rješenja o priznavanju i prestanku prava na porodičnu invalidninu, te rješenja za ličnu invalidninu, 76 rješenja o priznavanju i prestanku prava na novčanu egzistencijalnu naknadu za demobilizirane braniocima iznad 57 godina života, kompletirano i proslijeđeno na nadležno postupanje 18 zahtjeva za ostvarivanja prava na troškove dženaze demobiliziranog branioca, obrađeno 9 zahtjeva shodno Uredbi o vanrednoj novčanoj pomoći braniocima i članovima njihovih porodica, 123 zahtjeva za dodjelu novčane pomoći za nabavku obaveznih udžbenika za redovno obrazovanje u osnovnim i srednjim školama za braniocima i članove njihovih porodica, 178 zahtjeva o proširenom obimu prava iz oblasti zdravstvene zaštite za braniocima i članove njihovih porodica, 5 zahtjeva o pravu na zdravstveno osiguranje, 18 zahtjeva o medicinskoj rehabilitaciji branilaca i članova njihovih porodica u banjsko-klimatskim lječilištima, 276 zahtjeva o stipendiranju branilaca i članova njihovih porodica za akademsku 2020/21. godinu, 33 zahtjeva o naknadi troškova dženaze/sahrane branilaca i članova njihovih porodica, 2 zahtjeva za poticaj upošljavanja i samozapošljavanja pripadnika branilačke populacije, 315 zahtjeva za novčanu egzistencijalnu naknadu za demobilizirane braniocima mlađe od 57. godina, 879 zahtjeva za jednokratnu novčanu pomoć, 1 zahtjev za ostvarivanje prava na kiriju, 100 zahtjeva za plaćanje komunalnih usluga stanovništvu u stanju socijalne potrebe, izdato je 2.320 uvjerenje o primanjima...

U 2020. godini Odsjek za izbjegla, raseljena lica i povratnike riješio je 5 zahtjeva za privremeni smještaj plaćanjem stanarine za raseljene osobe, 4 zahtjeva za prestanak statusa raseljene osobe, 11 zahtjeva za

jednokratnu novčanu pomoć za raseljena lica i povratnike (teška ekonomska situacija, bolest, smrtni slučaj i dr.), 41 zahtjev za pomoć raseljenim licima i povratnicima, izdato je 85 uvjerenja o statusu... Iz evidencije i baze podataka DDPR ukupno je objavljeno 8 osoba. Razlozi za prestanak statusa su nastanjenje na području Federacije BiH i smrt. Zdravstvenu zaštitu koristi 21 porodica raseljenih osoba, a sa zdravstvene zaštite od 01.01. – 31.12.2020. godine nije bilo odjava.

U izvještajnom periodu održano je 7 redovnih sjednica Općinskog vijeća Kakanj, te 2 sjednice Predsjedništva Općinskog vijeća Kakanj. Razmatrano je 140 tačaka dnevnog reda. Na Budžet, te izmjene i dopune Budžeta Općine Kakanj za 2020. godinu odnosile su se 4 tačke, a na programe i planove 16 tačaka. Na vijećničkim klupama našlo se 46 odluka. Usvojeno je 27 zaključaka, 31 izvještaj i 8 informacija. Donešeno je 6 rješenja koja se odnose na utvrđivanje prava vlasništva i 5 rješenja koje se odnosi na imenovanja i razrješenja članova Upravnih odbora javnih ustanova, članova Skupština javnih preduzeća i članova radnih tijela i komisija Vijeća. Postavljeno je 35 vijećničkih pitanja, pokrenuto 70 inicijativa i dr.. Pored obavljenih poslova u pripremanju i održavanju sjednica Vijeća, u izvještajnom periodu Stručna služba za poslove Općinskog vijeća je izvršavala i slijedeće poslove i radne zadatke: priprema i održavanje 8 sjednica Kolegija Općinskog vijeća, izrada 12 zapisnika i audiozapisa sa sjednica Vijeća, izrada prijedloga Okvirnog programa rada Vijeća za 2021. godinu, izrada 296 izvornika usvojenih akata Vijeća, priprema, obrada i redakcija za 11 izdanja „Službenih novina Općine Kakanj“ sa 162 objavljena akta, ažuriranje Registra propisa Općine Kakanj za 2020. godinu za Registar propisa ZDK i Registar propisa Općine Kakanj 1996. – 2020... O radu Općinskog vijeća redovno je izvještavana javnost preko web-stranice, a osim toga javnosti su dostupna i vijećnička pitanja i inicijative vijećnika, zapisnici sa sjednica i Službene novine Općine Kakanj. U tehničkom smislu Služba je vijećnicima i javnosti omogućila i elektronski pristup svim dokumentima koji su razmatrani na Vijeću.

U toku 2020. godine podneseno je 10 zahtjeva za pristup informacijama i svi zahtjevi su blagovremeno riješeni. Također, u roku je dostavljen izvještaj Parlamentu Federacije BiH i Instituciji ombudsmena.

Tim za borbu protiv korupcije provodi aktivnosti oko izrade Plana integriteta Općine Kakanj za borbu protiv korupcije.

U proteklom periodu kontinuirano smo izvještavali o svim aktivnostima općinskog organa uprave (redovno se na adrese tridesetak medijskih kuća i novinara šalju informacije iz Općine), a kroz uspostavljene alate dvosmjerne komunikacije (društvene mreže, web-stranica Općine Kakanj, facebook fan page Općina Kakanj, e-mail: opcina@bih.net.ba i urednacelnika@kakanj.com.ba, upućivanje pisma na adresu Općine Kakanj, kutija za komentare i žalbe u prijemnoj kancelariji itd.) građani su dostavljali svoja mišljenja, sugestije, kritike ili primjedbe. Na poslovima informiranja javnosti radili su gotovo svi uposlenici Općine Kakanj. Eko-redari, inspektori, službenici, referenti, vatrogasci, uposlenici Zavoda, kolege iz javnih preduzeća i ustanova, svi su bili angažirani na dostavljanju informacija (zapisnici, fotosi, izvještaji...) u Stručnu službu za poslove Općinskog načelnika gdje se vrši obrada podataka, te objavljivanje informacija putem raspoloživih alata informiranja. Svaka anonimna prijava nelegalnih aktivnosti u okruženju je zaprimljena i bila je predmet postupanja i intervencije. Svim građanima koji žele ostati anonimni garantiramo anonimnost.

Na svečanosti koju su dana 14.10.2020. godine u Hotelu „Europa“ u Sarajevu upriličili Udruženje građana „Zašto ne“ i inicijativa Istinomjer, Općini Kakanj je dodijeljen certifikat za osvojeno drugo mjesto po otvorenosti. Ovo veliko i prestižno priznanje Općini Kakanj je dodijeljeno u konkurenciji 145 općina i gradova u BiH, a rezultat je istraživanja otvorenosti 145 općina i gradova u 2019. godini, koje je provelo Udruženje građana „Zašto ne?“ u okviru projekta Lokalni indeks otvorenosti. Lokalni indeks otvorenosti mjeri otvorenost svih jedinica lokalne samouprave u BiH, kroz oko 80 indikatora, a vodeći se međunarodnim preporukama i primjerima dobre prakse.

Krajem decembra 2020. godine održana je press konferencija na kojoj su govorili Općinski načelnik i Predsjedavajući Općinskog vijeća Kakanj, uz prisustvo velikog broj novinara i saradnika Općinskog načelnika.

Na kraju ističemo da svaki zaposlenik u administraciji Općine mora biti odgovoran i svjestan da postoji zbog građana, preduzeća i drugih subjekata, te da mu je glavni zadatak profesionalna, stručna, kvalitetna i brza usluga. Svaki korisnik usluga koje pruža Općina Kakanj mora biti dočekan i ispraćen sa osmijehom i vrhunskom ljubaznošću u šalter-sali i svim općinskim službenim prostorijama. Građani su pozvani da prijave slučajeve neprofesionalnog i neljubaznog osoblja na šalterima, kao i drugih službenika Općine Kakanj.

Broj: 02/1-1619/21
Kakanj, 15.03.2021. godine

OPĆINSKI NAČELNIK

Mirmes Bajtarević

